



Sabtu, 23 Maret 2024

Ogen: Job 6:14



Teman Setia



Kesetian gundari enggo jadi barang langka. Nai rusur nge kita meg i istilah *lupa kacang akan kulitnya*, ija pengertinna kurang lebih lupa nandangi kalak si nggo mpebelin-belin ia. Mbue gundari sibegi berita maka sekalak jelma merintis dari 0 (nol) ras ndeharana tapi kenca sukses lawes ia ras selingkuhenna. Kalak si nadingken temanna si setia sebab datca ka si tempa terulin. Menukah kepeken mpekusur ukur jelma.

Engkai maka kesetian e penting? Setia eme karakter Dibata, I Kor.1:9 "*Allah yang memanggil kamu....adalah setia*". Kesetian ertina biak si terteki, subuk bas pengerana ras perbahanen subuk man Tuhan bagepe man manusia. Kalak si pergeluhna itegu-tegu Kesah si Badia lit kesetian bas dirina, subuk bas perkara si kitik bagepe perkara si mbelin. Kesetian la banci luntur, la tergantung musim ras biakna tetap.

Katawari kita banci ngetehsa dirinta ntah kalak si rembak ras kita setia? Jababna sanga reh mara percuban bas geluhta. Job ras keselewetna iuji alu litna kiniseran si mberat. Ise saja si setia? Ndeharana lawes nadingken Job. Teman-teman Job labo ia itadingkenna, itemanina nge ia kundul datas abu, tapi pengeranana mahanca Job reh terpurukna, sebab ituntutna Job ngaku salah i bas kesalahen si la iakap Job lit ilakokenna. Job jine, kesetianna iuji kenca mate anak-anak, pinakit si mejin, kelungunen mesangat. Senembas ikutukna wari ketubuhenna, amin bage gia tetap ia malang man Tuhan. Tuhan ngenca teman si setia. Ia tetap ras kita ndalani kerina. Tuhan pe ngasup naruhkan anak-anakNa nemani ras mpegegehi kita asum berat babanta. Ernalemlah man baNa.